



Vischins perfetgs

Els n'èn betg mo ils vischins perfetgs, mabain era amis. Jau sun ventiraivla ed engraziaivla d'avair fatg midada avant in onn. Malgrà che jau hai stuì pachetar lura passa trenta stgatlàs da bananas e nundumbraivlas tastgas da l'Ikea, ves jau oz il barat da la veglia abitaziun cun la nova sco in dals megliers «deals» en mia vita.

Tgi na sa lamenta betg qua e là da ses vischins? In vischin è memia sensibel, tschel fima mintga saira ses joint sin il balcon, l'auter na supporta betg il tun dal tschitschapulvra ed auters fan orgias senza fin. Questa benedida setavla midada da chasa m'ha dentant purtà fortuna. Vischins sco or dal cudesch da maletgs – quai è il chavazzin. Mes vischins na possedan betg mo il tirastruvas adattà u fan amogna da temp en temp in bun café, na, els èn il medem mument era ina butia da rauba dal segund maun e semper prunts per tadlar. Il canapé antic e la maisa utilisada chattan ad interim segiramain in plaz tar ils vischins. Per buns cussegls van ins era il meglier tar la vischina. Cun ses dun da radiografar il concarstgaun ha ella bain inqual giada tutgà in punct sensibel. Mes vischins èn en il vair senn dal pled anghels e pregiudizis envers els na datti nagins. Sch'insatgi crititgescha e recloma davart ils vischins pens jau mo: «Questa benedida setavla giada ha purtà cletg.» Ma na, quai è gia stà l'indeschavla midada d'abitaziun, tanta fortuna n'hai jau dentant anc mai gì cun mes vischins. Els èn davaira ils megliers ed ils pli perfetgs vischins. Probablmain vegn jau a dischlocar in di en mes agen dachasa, però il siemi è per fortuna anc lunsch davent.

Sibylle Pfiffner